



Broj: 05/1-50-13-26-39-5/17

Sarajevo, 13.12.2017.

Na osnovu člana 3. Zakona o nezavisnim i nadzornim tijelima policijske strukture Bosne i Hercegovine („Službeni glasnik BiH“, broj 36/08), čl. 8. i 11. Poslovnika o radu Nezavisnog odbora kao nezavisnog tijela policijske strukture Bosne i Hercegovine („Službeni glasnik BiH“, broj 93/09), Odluke o uslovima i kriterijima za odabir, postupak ocjenjivanja i utvrđivanja rang-liste najuspješnijih kandidata otvorene konkurencije za izbor direktora i zamjenika direktora policijskih tijela Bosne i Hercegovine, broj: 03-34-6-36/10, od 5.1.2010., i Odluke o raspisivanju Javnog konkursa za provođenje procedure odabira kandidata na pozicije direktora i zamjenika direktora policijskih tijela Bosne i Hercegovine, broj: 05/1-50-13-26-39-4/17, od 13.12.2017., Nezavisni odbor kao nezavisno tijelo policijske strukture Bosne i Hercegovine r a s p i s u j e

## JAVNI KONKURS

za provođenje procedure odabira kandidata za izbor direktora i zamjenika direktora policijskih tijela Bosne i Hercegovine

### I. PRAVNI OSNOV

Nezavisni odbor kao nezavisno tijelo policijske strukture Bosne i Hercegovine, u skladu sa Zakonom o nezavisnim i nadzornim tijelima policijske strukture Bosne i Hercegovine („Službeni glasnik BiH“, broj 36/08) i Poslovníkom o radu Nezavisnog odbora kao nezavisnog tijela policijske strukture Bosne i Hercegovine („Službeni glasnik BiH“, broj 93/09), provodi postupak odabira najuspješnijih kandidata za pozicije:

#### **1/01 Direktor Granične policije Bosne i Hercegovine**

Broj izvršilaca: 1 (jedan)

#### **1/02 Zamjenik direktora Granične policije Bosne i Hercegovine**

Broj izvršilaca: 1 (jedan)

#### **2/01 Zamjenik direktora Državne agencije za istrage i zaštitu**

Broj izvršilaca: 1 (jedan)

#### **3/01 Direktor Direkcije za koordinaciju policijskih tijela Bosne i Hercegovine**

Broj izvršilaca: 1 (jedan)

### **3/02 Zamjenik direktora Direkcije za koordinaciju policijskih tijela Bosne i Hercegovine**

Broj izvršilaca: 2 (dva)

## **II. OPIS POSLOVA**

**1/01 Direktor Granične policije Bosne i Hercegovine** predstavlja Graničnu policiju Bosne i Hercegovine (u daljnjem tekstu: GPBiH); izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Vijeća ministara BiH, te nacrt godišnjeg budžeta GPBiH i predlaže ih ministru sigurnosti BiH, koji ih prosljeđuje Vijeću ministara BiH na usvajanje; rukovodi i usmjerava obavljanje poslova iz nadležnosti GPBiH; učestvuje u izradi planova aktivnosti kojim definira pitanja i radnje koje treba da budu preduzete u vezi sa sprečavanjem ilegalnih migracija, kao i krivičnih djela i prekršaja iz nadležnosti GPBiH; definira operativnu strategiju za uspješan nadzor i kontrolu državne granice; osigurava pravilno izvršavanje smjernica i naloga tužioca o radnjama policijskih službenika u vezi s krivičnim postupkom; osigurava saradnju s agencijama za provođenje zakona, te ostalim odgovarajućim organima u BiH; osigurava saradnju s organima za provođenje zakona i ostalim nadležnim službama stranih država, kao i provođenje ostalih međunarodnih sporazuma u oblasti nadzora i kontrole prelaska državne granice, kao i drugih međunarodnih instrumenata koji se odnose na pitanja iz nadležnosti GPBiH; predlaže nadležnom organu pokretanje pregovora u vezi sa zaključivanjem međunarodnih sporazuma o saradnji u vezi s pitanjima državne granice, uključujući sporazume o (re)admisiji; vrši stalne analize, radi racionalnog rasporeda osoblja i tehničkih sredstava; osigurava primjenu i poštivanje utvrđenih standarda profesionalnih vještina i obuke za osoblje; osigurava da GPBiH uspješno primjenjuje odredbe Zakona o kretanju i boravku stranaca i azilu te osigurava da osoblje GPBiH bude adekvatno obučeno u primjeni tog zakona; donosi pravilnik, uz saglasnost Vijeća ministara BiH, kao i druge propise predviđene zakonom koji su potrebni radi omogućavanja obavljanja poslova iz nadležnosti GPBiH; raspoređuje na dužnost pomoćnika direktora i imenuje rukovodioce organizacionih jedinica GPBiH u skladu sa zakonom, pravilnikom i drugim propisima; donosi odluke o zapošljavanju, raspredivanju i prestanku rada zaposlenih u GPBiH u skladu sa Zakonom o policijskim službenicima Bosne i Hercegovine i drugim zakonima i propisima; provodi aktivnosti za nabavku oružja i municije u saradnji s Agencijom za policijsku podršku, a uz saglasnost ministra sigurnosti BiH; provodi aktivnosti nabavke materijalno-tehničkih sredstava, koja Vijeće ministara BiH nije propisalo kao standardiziranu opremu; provodi aktivnosti u vezi s programom obuke i stručnog usavršavanja zaposlenih u GPBiH, a shodno Zakonu o Direkciji za koordinaciju policijskih tijela i Zakonu o policijskim službenicima Bosne i Hercegovine; podnosi godišnji izvještaj o radu GPBiH ministru sigurnosti BiH, koji ga prosljeđuje Vijeću ministara BiH, te posebne izvještaje po potrebi ili na zahtjev ministra sigurnosti BiH; podnosi izvještaje Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev; obavlja druge dužnosti propisane zakonom i drugim propisima. Direktor je odgovoran za zakonitost rada GPBiH i za zakonito trošenje sredstava dodijeljenih GPBiH iz budžeta institucija Bosne i Hercegovine i međunarodnih obaveza Bosne i Hercegovine. Direktor je za svoj rad i rad GPBiH odgovoran ministru sigurnosti BiH i Vijeću ministara BiH.

**1/02 Zamjenik direktora Granične policije** pomaže direktoru u obavljanju njegovih dužnosti, zamjenjuje direktora za vrijeme njegovog odsustva, obavlja pojedine dužnosti koje

mu prenese direktor, te izvršava zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova GPBiH. U slučaju spriječenosti direktora da ispunjava svoje dužnosti i odgovornosti, ispunjava ih zamjenik direktora, sve dok direktor ne bude ponovo u mogućnosti da ih preuzme ili do imenovanja novog direktora. Zamjenik direktora za svoj rad odgovoran je direktoru.

**2/01 Zamjenik direktora Državne agencije za istrage i zaštitu** zamjenjuje direktora za vrijeme njegovog odsustva, ispunjava pojedine dužnosti koje mu prenese direktor te obavlja zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova Državne agencije za istrage i zaštitu. Ako direktor nije u mogućnosti da ispunjava svoje dužnosti i odgovornosti, ispunjava ih zamjenik direktora, sve dok direktor ne bude ponovo u mogućnosti da ih preuzme ili do imenovanja novog direktora. Zamjenik direktora za svoj rad odgovoran je direktoru.

**3/01 Direktor Direkcije za koordinaciju policijskih tijela Bosne i Hercegovine** predstavlja Direkciju za koordinaciju policijskih tijela BiH (u daljnjem tekstu: Direkcija); izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Vijeća ministara BiH te nacrt godišnjeg budžeta Direkcije i predlaže ih ministru sigurnosti BiH, koji ih prosljeđuje Vijeću ministara BiH na usvajanje; rukovodi i usmjerava obavljanje poslova iz nadležnosti Direkcije; izvještava javnost o radu iz svoje nadležnosti; donosi pravilnik o unutrašnjoj organizaciji i sistematizaciji Direkcije uz saglasnost Vijeća ministara BiH, kao i druge propise predviđene zakonom koji su potrebni za omogućavanje obavljanja poslova iz nadležnosti Direkcije; raspoređuje dužnosti zaposlenim u Direkciji u skladu sa zakonom, pravilnikom o unutrašnjoj organizaciji i sistematizaciji Direkcije i drugim propisima; donosi odluke o zapošljavanju, raspoređivanju i prestanku rada zaposlenih u Direkciji u skladu sa Zakonom o policijskim službenicima Bosne i Hercegovine i drugim zakonima i propisima; obavlja aktivnosti u vezi s nabavkom opreme i sredstava za potrebe Direkcije; priprema i provodi programe obuke zaposlenih u Direkciji; podnosi godišnji izvještaj o radu Direkcije ministru sigurnosti BiH, koji ga prosljeđuje Vijeću ministara BiH, te posebne izvještaje prema potrebi ili na zahtjev ministra sigurnosti BiH; podnosi izvještaje Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev; obavlja druge dužnosti propisane zakonom i drugim propisima. Direktor je odgovoran za zakonitost rada Direkcije i za zakonito trošenje sredstava koja su joj dodijeljena.

**3/02 Zamjenik direktora Direkcije za koordinaciju policijskih tijela Bosne i Hercegovine** pomaže direktoru u obavljanju njegovih dužnosti, zamjenjuje direktora za vrijeme njegovog odsustva, ispunjava pojedine dužnosti koja mu prenese direktor, te izvršava zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova Direkcije za koordinaciju policijskih tijela BiH. U slučaju spriječenosti direktora da izvršava svoje dužnosti, izvršava ih jedan od zamjenika direktora, sve dok direktor ne bude ponovo u mogućnosti da ih preuzme ili do imenovanja novog direktora. Zamjenik direktora za svoj rad odgovoran je direktoru.

### III. MANDAT

Direktori i zamjenici direktora imenuju se na mandat od četiri godine.

#### **IV. OPĆI USLOVI**

Kandidati za sve pozicije moraju ispunjavati sljedeće opće uslove: da su stariji od 18 godina, da su državljani Bosne i Hercegovine, da nisu otpušteni iz državne službe u institucijama BiH, odnosno entiteta kao rezultat disciplinske mjere u periodu od tri godine prije dana podnošenja prijave za upražnjene pozicije, da su zdravstveno sposobni za obavljanje navedenih poslova na koje se prijavljuju, da se protiv njih ne vodi krivični postupak, da nisu osuđeni za krivično djelo, osim krivičnih djela protiv sigurnosti saobraćaja i da nisu obuhvaćeni odredbom člana IX. 1. Ustava Bosne i Hercegovine.

#### **V. POSEBNI USLOVI**

Osim općih uslova, kandidati za sve pozicije iz ovog javnog konkursa moraju ispunjavati i sljedeće posebne uslove, i to: da imaju visoku stručnu spremu – VII. stepen obrazovanja i radno iskustvo u toj spremi u trajanju od najmanje pet godina, da imaju čin glavnog inspektora policije ili viši čin i najmanje tri godine rada u tom činu i da nisu članovi političke stranke.

#### **VI. POTREBNA DOKUMENTACIJA**

Kandidat je dužan da uz prijavu na javni konkurs dostavi originale ili od nadležnog organa ovjerene kopije sljedećih dokumenata:

1. radnu biografiju (CV) sa izjavom o nacionalnom opredjeljenju, adresu i telefon za kontaktiranje;
2. uvjerenje o državljanstvu Bosne i Hercegovine, ne starije od šest mjeseci;
3. ovjerenu izjavu da nije otpušten iz državne službe u institucijama Bosne i Hercegovine, odnosno entiteta kao rezultat disciplinske mjere u periodu od tri godine prije dana podnošenja prijave za upražnjene pozicije;
4. uvjerenje da protiv nje ga nije pokrenut krivični postupak;
5. ovjerenu izjavu da nije obuhvaćen odredbom člana IX. stav 1. Ustava Bosne i Hercegovine;
6. ovjerenu kopiju fakultetske diplome (nostrificirane diplome ako fakultet nije završen u BiH ili je diploma stečena u nekoj drugoj državi nakon 6.4.1992.);
7. uvjerenje ili potvrdu o traženom radnom iskustvu u visokoj stručnoj spremi;
8. dokaz da posjeduje čin glavnog inspektora policije ili viši čin u trajanju od najmanje tri godine;
9. ovjerenu i potpisanu izjavu da nije član političke stranke;
10. ovjerenu izjavu da je saglasan s vršenjem sigurnosnih provjera.

**Napomena: Za sve kandidate koji dostave urednu i blagovremenu prijavu po službenoj dužnosti bit će izvršene provjere da li je osuđivan za krivično djelo, sa izuzetkom krivičnih djela iz oblasti sigurnosti saobraćaja.**

Nepotpune i neblagovremene prijave neće biti razmatrane.

Tokom postupka odabira Nezavisni odbor Parlamentarne skupštine Bosne i Hercegovine kao nezavisno tijelo policijske strukture BiH razmotrit će prijave kandidata i s kandidatima koji ispunjavaju tražene uslove obaviti intervju. Po okončanju postupka odabira Nezavisni odbor dostavit će ministru sigurnosti BiH imena najviše pet kandidata za direktore i imena najviše pet kandidata za zamjenike direktora policijskih tijela BiH.

Prije dostavljanja liste uspješnih kandidata ministru sigurnosti BiH kandidati su dužni da dostave dokaz Nezavisnom odboru da su zdravstveno sposobni za obavljanje poslova pozicija za koje su konkurisali.

## **VII. OBJAVLJIVANJE KONKURSA**

Ovaj konkurs objavljuje se u „Službenom glasniku BiH“, „Službenom glasniku Brčko Distrikta BiH“, u dnevnim listovima: „Dnevni avaz“, „Glas Srpske“ i „Večernji list“, kao i na internetskoj stranici Parlamentarne skupštine BiH.

## **VIII. ROK ZA PODNOŠENJE PRIJAVA**

Prijave na Javni konkurs s traženom dokumentacijom dostavljaju se preporučeno poštom, uz upozorenje „**NE OTVARATI**“, najkasnije 15 dana od dana objavljivanja u „Službenom glasniku BiH“ na adresu:

**Parlamentarna skupština Bosne i Hercegovine - Nezavisni odbor**

**71000 Sarajevo, Trg BiH br. 1, s naznakom**

**«Javni konkurs za direktore i zamjenike direktora policijskih tijela Bosne i Hercegovine»**